

摘藻堂四庫全書薈要

經部

欽定四庫全書薈要

經部

日講書經解義卷五



詳校官祭酒臣韋謙恒

欽定四庫全書薈要卷七百六十五

經部

日講書經解義卷五

盤庚上



盤庚乃有商之君自成湯都亳以來世有河患國都
屢遷至祖乙都耿盤庚時又圯于河水故欲遷都于

殷以避之其時小民蕩析離居而世家大族安土重
遷胥為浮言以惑民聽盤庚不驅以威不迫以刑而
反覆開諭使之自悟作誥三篇此則其上篇也

盤庚遷于殷民不適有居率籲衆感出矢言曰我王來
既爰宅于茲重我民無盡劉不能胥匡以生卜稽曰其
如台

此一章書乃盤庚以遷都之事告諭臣民也殷今河
南偃師地適往也率總也籲呼也衆感憂感之衆也
矢言誓言也我王指祖乙也宅居也茲指耿而言劉
殺也胥匡相救也史臣記其事曰盤庚將遷于殷意
在又安百姓乃百姓惑于浮言不肯往適安居之地

于是盤庚率呼衆憂感之人出誓言以諭之其言曰
我先王祖乙來都于此蓋以此地可居重我民之生
命耳豈預知今日之水患而盡置之死地乎民適不
幸罹此災害流離散處不能相救以安其生此豈人
謀良由天意我于是以遷都之事稽之于卜亦曰此
地昏墊已甚我亦無如之何則耿之不可奠居而當
遷也明矣

先王有服恪謹天命茲猶不常寧不常厥邑于今五邦

今不承于古罔知天之斷命矧曰其克從先王之烈若
顛木之有由藥天其永我命于茲新邑紹復先王之大
業底綏四方

此二節書先言不遷之害後言能遷之利見天命之
不可違祖業之不可棄也服事也五邦是五處建都
之地顛木傾仆之木也由藥新生之枝條也盤庚告
其臣民曰昔我先王遇國家有大政事莫不恪謹以
奉天命況茲遷都之事更不敢康寧一惟天命之是

凜所以不敢安居于厥邑自成湯至于祖乙五次遷
都于亳于囂于相于邢于耿迄無定居蓋知天命之
所在而不敢違越也今日耿既不可居而我不能承
先王之故事遷都以安百姓則是天之斷絕我命茫
然不知況曰其能順承先王之大業以永保天下乎
上察天心仰稽祖烈則遷都之事洵不可緩矣誠能
自耿遷殷譬如已顛之木而復有由蘖之生天心眷
顧必將永我國家之命于茲新邑先王一統之大業

于此紹復而四方亦賴以永安矣其可狃旦夕之安而不為久遠之圖哉蓋京師為四方之極百姓為王業之本根本既固則承天命光祖業綏四方皆在于此盤庚惓惓言之亦可謂能敬天威而重民依者矣盤庚敷于民由乃在位以常舊服正法度曰無或敢伏小人之攸箴王命衆悉至于庭

此一節書是史臣記盤庚訓誥在位之意也敷教也常舊服者先世常行之舊事也伏藏匿也箴箴規之

語也當日河水為患小民苦于昏墊而世家大族狃
安居之逸貪饒沃之利胥動浮言小民為所惑者有
之間有能審知利害而欲遷者又為世家大族所阻
抑排擊而不能達其情于上盤庚知其故史言其數
于民也自在位者始然亦非繩之以法動之以威惟
以先王舊常遷都之事以正今日之法度見已之順
天命者取法乎先王則人臣之虔職守者亦當恪遵
乎上命其大意若曰小人之中必有明于久遠之大

計而以言箴規于上者但爾羣臣懷目前之利而不顧其害懼衆論之是而欲掩其非伏之不使上達耳爾當宣暢其所欲言不可遏抑而排擠之也于是命衆人咸至于庭以聽誥辭焉盤庚可謂深悉民情之隱而能除壅蔽之患者矣

王若曰格汝衆予告汝訓汝猷黜乃心無傲從康

此一節書是責羣臣之各黜其私心也格至也猷謀也盤庚誥訓之意若曰汝臣民之衆其至于庭予告

汝以訓言凡汝之昧于遷都之利者皆汝之私心蔽之也汝當謀黜其私心無傲上之命而有驕慢之意無圖己之安而懷荒怠之心則尊卑之分明而久安之計得矣蓋人臣為國家斷大事定大謀必虛明公正意見且不得而參之汎雜以利欲之念乎故事君者當以克黜私心為要

古我先王亦惟圖任舊人共政王播告之修不匿厥指王用丕欽罔有逸言民用丕變今汝聒聒起信險膚予

弗知乃所訟

此一節書是言舊臣之賢而責今人之不然也舊人是世家舊臣播告詔令也指意指也丕大也逸過也聒聒多言之意起信是取信于民者險膚險陂膚淺之言也盤庚告其臣曰古我先王凡遇國家大事未嘗自專亦惟謀任舊人與之共事其時之臣亦能不負所任王有號令以播告于下舊人則能不匿其意指上之恩澤宣之于下下之箴言達之于上王用是

專信任使而大欽敬之也且利害之實趨避之宜皆告諸百姓罔有過逸之言變亂事理以惑民聽民心用是丕變而忘其勞苦先臣之賢如此今汝內則伏小人之攸箴外則胥動以浮言嘒嘒利口凡取信于百姓者率皆險誕而非正大之謨膚淺而無久遠之慮予弗知汝所訟言者果何為也其可不以先臣為法而上以致君下以感民共圖國事于永利哉

非予自荒茲德惟汝舍德不惕予一人予若觀火予亦

拙謀作乃逸

此一節書是責臣而併以自責之詞也荒廢棄也舍
藏匿也觀火見之甚明也作乃逸者成其過失也盤
庚告其臣曰予之遷殷也意在圖存豈勞民動衆而
自棄其愛民之德乎惟汝不能宣布上意使愛民之
德掩匿而不彰傲慢成習不畏懼余一人故也然我
視汝之情明若觀火但因我優柔姑息不能繩汝以
法拙于為謀以養成汝之過失責豈獨在汝乎此盤

庚假責已之詞以警動羣臣所謂以言語代鈇鉞詞則嚴而意則厚矣

若網在綱有條而不紊若農服田力穡乃亦有秋汝克黜乃心施實德于民至于婚友丕乃敢大言汝有積德此二節書是申言傲上從康之戒而欲其黜乃私心也綱所以繫網者條條理也紊亂也有秋秋成也婚友者婚姻僚友也盤庚告其臣曰汝之傲上也是不明于以下從上之義夫君者臣之綱也君令則臣共

若網之在綱綱舉則目張可以有條而不紊矣其可不以傲上為戒乎汝之從康也是不明于一勞永逸之計夫勞者逸之本也始勞則終逸若農夫必服勞于田畝盡力于稼穡乃有秋成之望矣其可不以從康為戒乎今汝阻撓遷都之計也內懷自私之心而外託于勞民之說此以市恩為德也惟謀久遠拯昏墊趨利避害乃為實德汝當自黜私心率民以遷以及婚姻僚友皆免沉溺之患是汝能施實德矣汝祖

若父有為民圖遷之德于前汝又有為民圖遷之德于後乃敢大言曰汝有積德若苟悅愚民坐昧大計何足為德乎

乃不畏戎毒于遠邇惰農自安不昏作勞不服田畝越其罔有黍稷

此一節書是申言從康之害也戎毒大害也昏強勉之謂也盤庚告其臣曰耿為河水所圯遠邇胥受其害去危即安在此時矣乃汝憚勞不遷曾不畏其大

害于遠邇百姓流離而邦國殄滅其何有即安之日
耶譬如惰農惟知自逸不强勉為勞苦之事不從事
于田畝之間欲望其黍稷之登也得乎蓋思艱圖寧
者國家之大計先憂後樂者臣子之大分奈何習于
從康而不自勉也哉

汝不和吉言于百姓惟汝自生毒乃敗禍奸宄以自災
于厥身乃既先惡于民乃奉其恫汝悔身何及相時愴
民猶胥顧于箴言其發有逸口矧予制乃短長之命汝

曷弗告朕而胥動以浮言恐沈于衆若火之燎于原不可嚮適其猶可撲滅則惟爾衆自作弗靖非予有咎

此一節書是反覆申言傲上之害也吉善也先惡謂倡率其惡也奉承受也恫痛也憮民小民也逸口過逸之言也恐恐動之也沈沈陷之也靖安也咎過也盤庚告其臣曰水災為患人情正當憂疑之際汝為人臣乃不能以和好之言宣道上德開諭百姓反以浮言惑之非獨貽害于民而已惟汝自生怨毒敗禍姦

宄之刑亦且災于汝之身矣汝既不導民以遷而又倡以浮言是民之惡汝實先之首惡之誅必不能免乃汝身自受其恫雖悔亦何及哉視彼小民尚能明于利害相與顧慮而以言箴規其上特其言之發而汝等以過逸之口排擊阻難之耳夫逸口尚且足以阻抑百姓況予操生殺予奪之權能制汝短長之命而可不畏乎人情誠有不便則當明以告朕共相權度其利害汝曷弗告朕而但以浮言相為煽動恐之

以遷徙之勞貽之以沉溺之患人情為汝所搖動雖
若難靜而予以制命之權猶可得而遏抑之若火之
燎于原其勢雖盛不可嚮邇猶可得而撲滅之也汝
亦何所恃耶然此皆汝等不能安靜以奉上命自速
其禍耳豈予樂用威刑以加汝也奈何不以傲上為
戒哉

遲任有言曰人惟求舊器非求舊惟新古我先王暨乃
祖乃父胥及逸勤予敢動用非罰世選爾勞予不掩爾

善茲予大亨于先王爾祖其從與享之作福作災予亦不敢動用非德

此二節書是感動世臣大族之言也遲任古賢人也胥及逸勤者相與同勞逸也敢何敢也非罰謂不當罰而罰非德謂不當賞而賞盤庚告其臣曰國家之有舊人也所與同休戚共安危故當一德一心以共謀國事昔遲任有言曰朝廷用人必求夫世臣舊家而用之為其練習典故繫屬人情非同于器物之用

但求其新不求其舊而已也我今日諸臣皆累世勲
舊之裔昔我先王與乃祖乃父君臣一德無事則同
享其逸有事則共任其勤功在社稷由來久矣汝為
功臣之子孫我豈敢動用非理之罰以加汝乎爾祖
父之勤勞我國家世世簡在王心豈予今日獨掩汝
之善而不選其勞乎茲予大享祀于先王之時爾祖
亦以功而配食于先王之廟先王臨之于上爾祖質
之于旁凡作福作災皆先王與爾祖實式憑之我亦

何敢動用非理之恩以加汝乎賞罰皆不敢私則爾諸臣亦宜感且懼矣而可以激上從康乎哉

予告汝于難若射之有志汝無侮老成人無弱孤有幼各長于厥居勉出乃力聽予一人之作猷

此一節書是示以欲遷之志而戒勉之也難遷徙之艱難也弱輕忽之也猷遷都之謀也盤庚告其臣曰今日之事遷都既已動衆而人言又有異同其事誠難然我之諄諄告汝者蓋審利害計久遠確見其當

遷如射者之志惟期于中的而無有他意矣況今日
老成孤幼之中豈無明于大計而知遷都之利者汝
勿以老成之言為不足聽而侮之勿以孤幼之謀為
不足用而少之舍目前苟安之計為百年居止之謀
勉出乃力而無耽于從康聽我一人遷都之計而無
苟于傲上如此則去危即安難者不終于難安民定
邦之志亦庶乎其有成矣

無有遠邇用罪伐厥死用德彰厥善邦之臧惟汝衆邦

之不臧惟予一人有佚罰

此一節書是言賞罰之嚴而深警之也伐猶誅也佚
罰失所當罰也盤庚告其臣曰今日遷都之計國家
之安危所係即朝廷之賞罰攸關無論遠近親疎之
臣傲上從康是爾之罪矣我則刑戮加之置之死地
而不宥勤勞為國是爾之德矣我則爵賞榮之顯其
善行而不蔽蓋遷都則先業由茲紹復四方由茲底
定而為邦之臧矣是皆由汝衆用德之故而安能不

彰厥善哉若不遷都則百姓自此淪喪大命自此中
衰而為邦之不臧矣是皆由我一人失刑之故不能
罰所當罰而姑息養安以致此也而安能不伐厥死
哉則今日賞罰之典有斷然不可已者汝衆宜知儆
矣

凡爾衆其惟致告自今至于後日各恭爾事齊乃位度
乃口罰及爾身弗可悔

此一節書是戒飭羣臣之詞而終以罰儆之也致告

使之各相告也齊整飭也度法度也盤庚告其臣曰
凡我在廷諸臣其以我言轉相告戒自今日以至遷
都之時各恪恭汝事而無即于怠荒整齊汝位而無
苟于傲慢法度汝言而無傷于浮動則國計可定而
為汝之德矣否則罰罪之典將及汝身雖悔其可追
乎盤庚之遷本以利民也寧為優游不忍之辭而無
刻急嚴苛之意既未嘗干譽以徇民亦未嘗拂民以
從欲可謂交善矣先儒謂反復三篇當于包容不迫

處觀其德量于委曲訓誥處觀其恩意于規畫細密
處觀其措置可以為處大事斷大謀之法矣

盤庚中

此盤庚將遷而告其民之詞史臣述之為中篇

盤庚作惟涉河以民遷乃詁民之弗率誕告用亶其有
衆咸造勿褻在王庭盤庚乃登進厥民曰明聽朕言無
荒失朕命

此二節書史臣記盤庚申告弗率之民也作者是起

而將遷之辭誕大也直誠也咸造皆至也史臣謂盤
庚既訓勉其臣于是啟行將涉河而南遷都于殷此
時之民尚有惑于利害而心懷疑貳者盤庚不忍驅
以刑罰乃以話言曉諭弗率之民出至誠以相告蓋
遷都乃為民之實意誠信誕孚雖愚頑皆可感格于
是有衆咸至王庭又戒其無得褻慢欲其恭敬以聽
上命也盤庚乃登進其民而告之曰凡我所以告汝
衆者當明聽之遵信奉行無怠棄朕命而不從也當

時風俗近古小民皆得入見至尊親聞誥令上無不
宣之君德下無不達之民情所以疾苦上聞而恩澤
旁流也

嗚呼古我前后罔不惟民之承保后胥感鮮以不浮于
天時

此一節書見君臣一體相關之意也承敬也胥感同
其憂也浮者勝之也盤庚告其民曰遷都之事君為
民計安全民亦當與君共憂患昔我列祖當水災為

虐無不以民之利害為己之利害敬謹恪恭圖謀萬全其時百姓亦莫不保愛其君同其憂感所以上下一心和以致福雖遇天時為患皆以人力勝之去危即安國祚民生賴以永寧此先世君民同德之效汝所當取法者也

殷降大虐先王不懷厥攸作視民利用遷汝曷弗念我古后之聞承汝俾汝惟喜康共非汝有咎比于罰

此一節書又明示民以遷都之意也虐害也懷安也

古后即先王咎罪也盤庚曰國有疑謀必稽諸舊聞而斷自先王汝民不聞先王遷都之事乎昔我殷邦河水為災天降大害我先王承民之心不敢安居其所興作惟視民所利益用以遷徙謀斷于上而民志不疑先王之往事如此汝民曷不念我遷都之舉實聞之先王凡所以敬汝民命而使汝遷都者惟喜與汝遠避河水之害而共享安居之利亦猶先王視民利用遷之意也豈以汝民有罪而比附于遷謫之罰

哉

予若籲懷茲新邑亦惟汝故以丕從厥志

此一節書言遷都所以為民生正所以從民志也籲呼也懷解作來新邑指洛都也盤庚曰爾民之不樂遷徙將無疑我拂衆以從己之欲耶我思趨利遠害舍危即安汝之本志固然而乃不肯遷者當是為浮言所搖惑耳我所以不憚語言諄復招呼懷來於此新邑者亦惟因汝蕩析離居之故欲貽汝安康以大從

汝之志也我從汝之志而視利以用遷汝曷不體我之心而圖遷以趨利哉

今予將試以汝遷安定厥邦汝不憂朕心之攸困乃咸大不宣乃心欽念以忱動予一人爾惟自鞠自苦若乘舟汝弗濟臭厥載爾忱不屬惟胥以沈不其或稽自怒曷瘳此一節書又以不遷之害警動庶民也試用也忱誠也鞠窮也臭猶言敗屬續也稽察也曷瘳言不可救也盤庚曰邦依民以立民依邦以安耿受河患爾民

蕩析離居今我念先王承民之意將試以汝遷徙而
安定其邦國使汝民得永賴安全我勞心籌畫承汝
之心謂宜有孚于汝矣汝不憂我心之所困苦乃皆
大不宣布汝心而敬慎思念以汝之誠感動我一人
宜先王之民所云保后胥感者乎將望汝協心力以
勝天時爾乃惟紛紛自取窮苦譬若乘舟汝不及時
以濟必臭敗其所載之資今日遷都正君民同心共
濟之時汝從上之誠閒斷不屬則亦焉能有濟乎惟

相與及于沉溺而已利害昭然如此爾民曾不稽察以早決從違但自生怨疾忿怒亦曷救于沉溺之苦哉予不能為汝解已

汝不謀長以思乃災汝誕勸憂今其有今罔後汝何生在上

此一節書承上文而言不遷之害也誕大也上謂天也盤庚曰我思先民之保后而勝天者安危之故悉而生死之計審也汝民不為長遠之謀以思不遷之

禍是汝分明安危利災而大以憂自勸也然或暫苦
沉溺于目前幾幸安定于後日猶可說也今但有今
日而無後日是天斷棄汝命汝有何生理于天乎甚
矣汝之勸憂也予承汝康汝之心其何能已哉
今予命汝一無起穢以自臭恐人倚乃身迂乃心

此一節書承上文既言不遷之害而欲民之決于從
遷也穢謂惡倚偏也迂曲也盤庚曰我想汝之憚于
從遷由于浮言之搖惑汝之惑于浮言由于心志之

疑貳今我命汝專一乃心從我遷徙無起傲上從康
之穢惡以自臭敗蓋中心有主則邪僻不能干苟汝
心不一恐浮言之人倚汝之身外導以傾邪迂汝之
心內誘以紆曲則利害去就不得以自由矣汝民可
不省悟浮言之非而一心以聽予乎

予迂續乃命于天子豈汝威用奉畜汝衆

此一節書又發明其為民遷都之意也迂迎也畜養
也盤庚曰我所以欲汝一心從遷者豈以自利哉蓋

天為民立君君為民立命耿圯河水有今罔後汝命
垂絕我實承汝恣晏然不為之所乎我今以汝遷都
乃以汝垂絕之命迎續于天予豈脅汝以威哉用奉
養汝衆使罔後而有後無生而更生我意蓋如此汝
民可不思乎

予念我先神后之勞爾先予丕克羞爾用懷爾然

此一節書承上文奉畜汝衆而言而又動之以念其
先人也羞解作養盤庚曰遷都之事我先世神聖之

君屢有成烈當日保后胥應竭力從遷者則爾先人也我思念我先神后之勞爾先人爾先人不以為勞而勇于趨利我今圖遷所以大克奉養爾衆用懷念爾為先民之子孫不忍坐視其蕩析離居而然爾民乃不體我心而欣然從遷何耶

失于政陳于茲高后丕乃崇降罪疾曰曷虐朕民

此一節書是恐民心疑貳又舉鬼神之事以警懼之也陳猶言久崇大也高后高祖也盤庚曰人君之政

莫要于安民今耿圯水患民之不安甚矣我實為君
若不為民圖遷是失安民之政而久居于此也且汝
民固我高后之遺黎也我若坐視爾等沉溺而不救我
高后成湯在天之靈必大降罪疾于我曰汝為民父
母何虐害我民而不置于安全乎則我亦將無辭以
逭其責矣我即欲不遷能不畏我高后哉

汝萬民乃不生生暨予一人猷同心先后丕降與汝罪
疾曰曷不暨朕幼孫有比故有爽德自上其罰汝汝罔

能迪

此一節書言民不從遷將得罪于先后也生生者生
養不窮之意猷謀也幼孫盤庚自稱比同事也爽德
猶言失德迪道也盤庚曰我之遷都固大懼獲罪于
我先后將以生汝汝萬民乃不自求生養無窮之計
與我一人共謀同心以從遷而趨利則罪在汝矣我
先后必大降罪疾于汝曰何不與我幼孫合心合力
以遷故有此起穢傲上之失德先后愛汝之心一旦

赫然易慮自上降罰于汝汝將何道以自免乎予又
為汝滋懼已

古我先后既勞乃祖乃父汝共作我畜民汝有戕則在
乃心我先后綏乃祖乃父乃祖乃父乃斷棄汝不救乃
死

此一節書言民不從遷且并得罪于其祖父也戕害
也綏者慰安之意盤庚曰汝民疑阻不遷不但得罪
于我先王即爾祖父亦于汝有隱痛焉昔我先王遷

都既勞汝祖汝父是汝祖父實明于君臣之分誼者也我繼先王而為君則汝皆為我所畜養之民汝若能以汝祖父之事先王者事我即為汝祖父之孝子順孫矣今河水為患我效我先后而遷都以康汝汝不法汝祖父而從我以遷是即戕害生民矣苟有戕害在汝之心我先王念汝祖父實有成勞必安慰汝祖父致其用罰之意汝祖父素明大義乃斷棄汝而不救汝之死于先王之前矣汝一不從遷難逃祖父

之責如此可以不畏哉

茲予有亂政同位具乃貝玉乃祖乃父丕乃告我高后
曰作丕刑于朕孫迪高后丕乃崇降弗祥

此一節書又對民而責臣也亂解作治具者多取而
兼有之也盤庚曰汝民不肯從遷實為浮言所惑汝
亦知浮言者之譴罰皆將無所宥乎茲我治政之臣
所與共天位者不以安民為念惟畜聚寶玉以自便
其身圖汝雖為其浮言所愚其乃祖乃父早已摘其

隱伏相與告我高后成湯曰我子孫為臣不忠棄義
貪利其大作刑戮于我子孫以討其罪是諸臣祖父
實啟我高后大降不祥而不赦夫臣不圖遷乃祖乃
父且加禍謫焉汝民其可惑于浮言而不遷乎

嗚呼今予告汝不易永敬大恤無胥絕遠汝分猷念以
相從各設中于乃心

此一節書是既反覆勸誡決計遷都又嘆息而言之
也恤猶言憂猷圖謀也設安設也盤庚曰遷都之事

我亦豈敢漫然哉今我諄切告汝無非其難之意然而必于遷者蓋利害安危之故我心籌之已審汝當即我之所大憂恤者而永敬之無使上下之情相去絕遠而誠意不相連屬也如我以安民為謀汝當分我之謀而相與共圖之我以憂民為念汝當分我之念而相與共念之同心協力期于相濟以有成乃為可耳然欲體我之心又必先正汝之心蓋是非利害人心皆有極至之理但人迂乃心而不覺耳汝今各

設大中至正之則于汝心則知遷都之議斷不容已而浮言不復能搖汝矣

乃有不吉不迪顛越不恭暫遇姦宄我乃劓殄滅之無遺育無俾易種于茲新邑

此一節書又嚴號令以防乘隙生變之人也吉善也迪道也顛越顛倒違越也劓者割鼻之刑遺留也育生育也易猶言移也盤庚曰刑有典常不當意為輕重然法從權制豈可姑息容奸今當遷徙正宜嚴肅

乃有不善不道之人顛倒違越不恭上命敢行暴亂
及暫時所遇為姦為宄乘機竊掠者此非可以常例
論也我小則加之以劓刑大則絕滅之無有遺育無
使移其種于此新造之邑宜淫刑以逞哉欲保全善
類不得不嚴創奸宄法在必行尚其戒哉

往哉生生今予將試以汝遷永建乃家

此一節書又以利堅庶民從遷之意也盤庚曰耿被
河患汝民不能聊生矣往哉樂生興事在此新邑今

我將用汝以遷為一勞永逸之計使汝永立乃家身
享居食之樂復傳子孫于無窮則汝民能念先民之
勞予亦因得追先后之烈矣勉哉噫元后作民父母
盤庚之民傲上從康不恭上命初未嘗怵之以威利
害安危反覆開道務以誠意相為感通煦煦焉如慈
親之怙幼子真不媿元后父母矣為人上者尚其以
盤庚為法哉

盤庚下

此盤庚既遷都而慰勞戒勉其臣民之詞史臣述之
為下篇

盤庚既遷奠厥攸居乃正厥位綏爰有衆曰無戲怠懋
建大命

此二節書史臣記盤庚之遷而述其慰勉臣民之言
也奠安定也居者官民之居止位者上下之位序史
臣謂盤庚之遷都凡以謀厥居耳今既遷新邑定厥
邦于斯建乃家于斯臣民之居止皆已定矣然國家

新造之時體統未能即肅而臣民播遷之後勞怨難以遽忘盤庚乃正其上下尊卑之位而慰安臣民遷徙之勞且將以釋其猜貳而勸其圖新也曰遷國之始正君臣上下趨事赴功之時爾等敝上從康之故習不可以不戒也尚其無戲而各敬乃事無怠而各勤乃事乎然我非不念爾之勞瘁而過于督責也蓋永命者在天立命則在人必也臣盡常職而崇功廣業民安常業而樂生興事共勉力以建大命斯民有

以遂其生國有以永其祚而億萬世無窮之計在于此矣

今予其敷心腹腎腸歷告爾百姓于朕志罔罪爾衆爾無共怒協比讒言予一人

此一節書盤庚既戒勉之以作其氣復開示之以釋其疑也敷心腹腎腸言吐露衷曲也歷猶言盡也百姓是庶民與百官族姓兼臣民而言協合同也比附和也盤庚曰上下之情欲其相信今我敷布心腹腎

腸開誠吐露盡告爾臣民以朕志使爾等悉知前遷
都之時恐浮言之徒有倡為事後加罪之說者豈知
我早已釋然不復追究往事加罪於爾衆也爾衆其
各安心守分無共懷怨怒疑慮相煽合同附和而興
讒謗之言于我一人如此則上下相信兩無猜嫌國
家共保福祚于無窮矣

古我先王將多于前功適于山用降我凶德嘉績于朕
邦

此一節書叙先王遷都之善也先王指成湯多者推廣之意適往也亳都依山故云適于山降下也即除去之意凶德災禍也盤庚曰昔我先王成湯以始祖契建都于亳國無水患功在生民其後屢遷前功幾墜于是將增多于前功而恢復之故復適于高山之亳山高土厚用除去我國家昏墊之凶禍而河水不能災于以安居樂業修政立事而有嘉美之績于我國家所謂厥邦安定而四方底綏者我先王實然矣

今我民用蕩析離居罔有定極爾謂朕曷震動萬民以遷

此一節書又自叙其遷都之意也極解作止盤庚曰我之以汝遷都正因耿為河水所圯爾民用不得保聚浮蕩分析離散居處無有定止乃陷于凶德而宜急圖嘉績之時爾民反謂我何故震動萬民以遷若我無故而毒苦爾者豈惟悖于先王當亦未知天意耳

肆上帝將復我高祖之德亂越我家朕及篤敬恭承民
命用永地于新邑

此一節書是援天意以曉臣民也亂治也越及也篤
敬謂誠篤恭敬之臣盤庚曰紹復先業予豈敢自為
功哉蓋天實啟之矣今耿圯河水上帝將復我高祖
成湯之德治及我國家故啟牖我心使我與二三篤
敬忠誠體國之臣熟審利害決計遷殷用敬承汝民
垂絕之命而迓續之使避害趨利舍危就安用長居

于此新邑民安則國治庶幾祖德以復而天意為無負已

肆予沖人非廢厥謀弔由靈各非敢違卜用宏茲責

此一節書又慰諭臣民以釋其疑懼之意也沖人盤庚自稱弔解作至由用也靈善也宏者恢擴之意責大也盤庚曰遷都之舉蓋嘗叅之人謀而決諸龜卜矣當時爾臣民中多言不可遷者非我沖人廢棄爾謀而違衆以自用也蓋謀不貴于多而貴于善爾臣

民中有深悉利害而建議當遷者是謂善謀我乃至取其善者而用之予何容心焉即爾衆之不肯從遷亦非敢故違我吉卜也想以為輕易遷徙國本動搖不若聽從民便待水患自息而蕩析可以無虞亦用恢宏此國家之大業耳由今思之我非有意于違衆爾亦非有意于違卜上下之情固均可原諒也復何嫌何疑而有懼意哉

嗚呼邦伯師長百執事之人尚皆隱哉

此一節書是以安民之功專責臣下也邦伯統率諸侯之官師長衆官之長百執事大夫以下有執事之官隱猶痛也盤庚嘆息而言曰今日者大事已成矣上下之情亦通矣新遷之民生計未復責在民牧爾羣臣有任岳牧而為諸侯之統帥者有任公卿而為衆官之師長者有各司一職而為百執事者位職尊卑雖有不同而安民之寄則一今我百姓播蕩艱難爾羣臣尚皆惻然隱痛于心哉心誠隱痛則所以撫

恤而安全之者自不能不盡其職矣

予其懋簡相爾念敬我衆

此一節書又明示已任臣為民之意也懋勉也簡擇也相者開導之意盤庚曰人君之務知人為先人臣之職安民為要予敢不先自勉哉自今以往我其勉力以簡擇爾愛民之臣而委任之開道爾愛民之心而鼓舞之爾諸臣亦實體我承民之意而念敬我衆乎念者存諸心而不忘敬者慎其心而不忽苟念敬

稍弛民即有不得其所者矣可不審哉

朕不肩好貨敢恭生生鞠人謀人之保居敘欽

此一節書是以懋簡相爾之實告羣臣也肩任也敢
勇也鞠養育也敘用也盤庚曰從來聚斂之臣恒至
于戕民而病國爾諸臣中有貪好貨財者朕決不任
用以其培克聚斂不念敬我衆也惟勇于敬民以其
生生為念凡小民利害安危之故一身擔當毫無顧
慮民不能自養則毅然身為撫恤而必遂其養民不

能自保其居則毅然代為營謀而務保其居必如是
盡心竭力方是能念敬我衆者我則錄其功而敘之
優以禮而欽之予懋簡之意蓋如此夫民之失業由
官邪也誠人臣以黷貨為戒而急急惟民利之求則殷
阜樂康於是乎在而人主持此意以用人其所以謹
好惡而明取舍又孰加于此哉

今我既羞告爾于朕志若否罔有弗欽

此一節書前既明示諸臣而因欲其善體已意也羞

進也若順也否不順也盤庚曰人臣奉職每同人主
愛民之志意以為從違今我意在念敬我衆而不欲
專利以自封既進告爾等以朕志我所不肩是不順
我意者我所叙欽是順我意者凡順與否既明明言
之矣爾等當咸喻我意毋好貨而敢恭生生無有不
欽我之命也民生主德皆于爾諸臣賴之可不念哉
無總于貨寶生生自庸

此一節書又申罔有不欽之實而戒勉其臣也總聚

也庸者安民之功盤庚曰具乃貝玉爾諸臣嘗有此
故習矣今必以是為戒其無謀聚貨寶而腴民之生
以自封殖也往哉生生向曾不以為念矣今必以是
為勉敢恭生生而安民以自為功可也下以厚民生
上以奉君命斯為念敬而罔不欽者已

式敷民德永肩一心

此一節書又望羣臣為民之心始終勿替也式敬也
敷布也肩任也盤庚曰爾諸臣不總貨寶則民利興

生生自庸則民生遂此為民之大德也但人情多勤
于始而怠于終鮮有能久而不變者汝等當兢兢業
業以敷布為民之德自今至于後日常任一心不雜
不貳則德惠垂于無窮矣予視利用遷汝能為民導
利而利于以不匱予迓續乃命汝能為民立命而命
賴以有永庶幾哉予不負百姓亦可仰告我先王矣
夫盤庚戒勉其臣民以通上下之情慰疑懼之意而
于天之所以愛民臣之所以奉君獨惓惓而不已至

好貨之戒尤反覆致意焉蓋人臣不自利則必急公
急公則愛國愛國則重民命而凡可以遂民之生者
無不勇往而力任所謂正本清源之道蓋如此而其
詞和平其意諄復而不厭若盤庚真可謂愛民之主
矣

說命上

商高宗感夢而得傳說遂命以為相史臣記高宗命
說之詞及說進告之語為書三篇而總名之曰說命

者以見臣之得盡言于君由君之能命其臣也此是
第一篇

王宅憂亮陰三祀既免喪其惟弗言羣臣咸諫于王曰
嗚呼知之曰明哲明哲實作則天子惟君萬邦百官承
式王言惟作命不言臣下罔攸稟令

此一節書史臣將敘高宗命說之詞而先敘其事也
王是高宗宅憂乃居喪也亮陰當作諒闇是居喪之
所王遭父小乙之喪遵行古禮居憂于亮闇中三年

不親政事不發號令使百官俱聽命于冢宰及大祥
後喪服已除猶未發號施令裁決庶務羣臣不測其
故咸進諫于王曰嗚呼均是人也獨于衆人之中有
聰明睿智洞乎理而燭乎事者謂之明哲明哲之人
晰理精而處事當實為人之法則今天子聰明首出
君臨萬邦正所謂明哲作則百官之所仰承而欽式
者王本明哲以為言即可以作則而為命使臣下知
所遵奉若祕其明哲而不言則君既無以令于下臣

下無所法則將何所稟奉而行乎言不言所係之重
如此王可不言以作則于下哉

王庸作書以誥曰以台正于四方台恐德弗類茲故弗
言恭默思道夢帝賚予良弼其代予言

此一節書高宗因羣臣咸諫作書誥喻所以不言之
意也庸用也賚與也高宗曰諸臣疑我不言亦知我
有不敢輕言及不必自言之故乎我居人君之位將
表正于四方任大責重我恐明哲之德不類前人無

以君臨萬邦而為爾百官之所承式我所以不敢輕
易發言者以此故也然亦豈敢嘿嘿而已惟恭敬淵默
收斂此心思想治天下之道湛然寧謐之中精誠感
孚儼通帝載爰夢上帝與我一賢相將使論道輔政
以代予言又何庸我自言然後有所稟令耶夫惟至
誠為能格天高宗篤恭淵默誠心求賢與上天生賢
之心相合無間故其感通如此程頤有云靜則自明
夫明生于誠誠生于靜朗鑑空懸而物來自照非靜

之驗哉恭默感通之妙有自來矣

乃審厥象俾以形旁求于天下說築傅巖之野惟肖

此一節書史臣記得賢之始也審詳也築築墻也傅巖地名在虞虢之間今山西平陸縣肖似也高宗既夢良弼而急欲得其人乃追夢中之所見而諦審其象繪畫成形俾遍求于天下務求必得適遇一人名說卜居于傅巖之野與所圖夢中之形恰相似夫夢寐之間竟以形相告而天下之大直接圖而得之君

臣相遇天作之合豈偶然哉

爰立作相王置諸其左右

此一節書史臣記任賢之重也高宗既得傳說與之語果聖人也于是擢以不次之位委國授政立以為相又以冢宰兼師保之職置諸左右而親信之無間焉其任用之專如此夫人君職在擇相相得其人非獨崇其體貌已也又必委信而親近之而後可以收輔德之益記曰相觀而善之謂摩荀況曰學莫便乎

近其人高宗相說而置左右其得此意也夫

命之曰朝夕納誨以輔台德

此一節書高宗既任傳說而命之也納誨進言也高宗曰諸臣向以承式之故求我于言我思表正之要惟在于德汝今在我左右必朝夕進納善言啟我所未知誘我以未行務俾我遷善改過德日進于高明光大而免于弗類焉庶可以表正萬邦而無愧于明哲作則之任已夫人君求治必以德為本相臣之業

莫大于輔君德高宗命相未及他事而首責之以納
誨輔德真探本之論也

若金用汝作礪若濟巨川用汝作舟楫若歲大旱用汝
作霖雨

此一節書高宗託物以喻其屬望之意也金謂刀劍
等器古者銅鐵之屬皆稱金礪磨石也濟涉水也巨
川大川也楫槳也雨三日以往為霖高宗曰納誨固
在于汝而用汝則在于予我之于汝相須蓋甚殷已

不見金之資礪以成器乎以予賦質頑鈍用汝磨礪
砥礪輔我之德以歸于成者即金之必資于礪也不
但已也巨川非舟楫莫能濟予欲弘濟艱難用汝扶
持引掖輔我之德以成利濟之功者即濟巨川之必
資于舟楫也不但已也大旱非霖雨莫能蘇予欲施
膏潤物用汝承流宣化輔我之德務使膏澤洽乎黎
庶即大旱之需霖雨也予之所望于汝者如此其切
所資于汝者如此其大汝可不朝夕納誨以輔予乎

噫高宗虛懷誘諫舍己從人但欲自成其德而不必德之自己成但欲濟時利物而不必功之自己立其心至虛其量至廣卒成千古令主宜哉

啓乃心沃朕心

此一節書高宗以納誨輔德之實望傳說也啓開也沃灌溉也高宗曰德具于朕之心而誨發于汝之心爾不開汝之心而盡言無隱何以溉朕之心而聰明日益乎今朕望汝納誨輔德原非求諸言詮也必也

大啓汝之心于凡修德之方致治之道披誠露膽知
無不言言無不盡用以浸潤灌溉乎朕之心使我心
義理浹洽融會透徹充足而饜飫焉斯汝之納誨無
不盡而朕之受益為甚深矣夫君臣之勢尊卑濶絕
所相感者心耳必臣之心昭明無隱然後隨事進規
可以導君子善必君之心虛誠若渴然後其臣犯顏
色觸忌諱而不忤上下一心洞達無間于以贊成盛
德豈不休哉

若藥弗瞑眩厥疾弗瘳若跣弗視地厥足用傷

此一節書高宗既以啓心沃心望傳說又設喻以致其丁寧之意也瞑眩飲藥而苦頭目昏悶也瘳愈也跣跣足也高宗曰朕之所以切切然望汝啓心沃心者誠以人臣必進苦口之言而後能有救過之益人君必有燭理之明而後能免冥行之失今我過愆已多汝必盡情直諫庶可由以省改若服藥然不至于瞑眩則疾必不能痊朕心冒昧無所識知汝必明白

指示庶可資以攸往若跣足然目一不視地厥足必
至于傷然則啓心沃心以納誨輔德顧可須臾緩哉
惟暨乃僚罔不同心以匡乃辟俾率先王迪我高后以
康兆民

此一節書高宗又望傳說以人事君也乃僚謂說之
僚屬匡正也乃辟高宗自謂率循也先王商先哲王
迪者遵行之意高后指成湯也高宗曰予用汝為相
凡匡主安民之道汝實有之矣然獨任則勞分任則

逸今汝既總百官則卿士以下皆爾僚屬也彼亦孰
無事君之責乎汝必一身倡率與大小臣工同心合
志以救正汝君或宅心未正或行事乖宜即當直言
匡弼務使我率循先王太甲太戊祖乙盤庚諸賢君
繼述之道而蹈我高后成湯已行之迹以安天下之
兆民使羣黎百姓無一不得其所庶幾綏猷輯寧之
化不殊于當時而彰信允懷之休復見于今日則汝
輔相之功斯大矣可不勉哉人君之道在法祖以安

民為相臣者振飭百官共扶宸極蓋必君德無忝厥祖君澤下究于民而後輔弼之責始不負乎

嗚呼欽予時命其惟有終

此一節書高宗命說已畢又總致其丁寧之意也時是也高宗嘆息曰納誨輔德同心匡辟予之屬望于汝者亦深且切已汝當敬承此命而無忽苟君德未成則是汝之輔德無有終也兆民未安則是汝之匡辟無有終也汝其啓心沃心務使作則無愧于先王

而求以終其事可也念之哉大要銳始易而慎終難以慎終之意謀始則必無苟且姑息之謀以慎始之意圖終則自有奮厲振起之效無論君道與臣職學業與治功總皆以有終為主魏徵十思十漸之箴其猶有終之義也夫

說復于王曰惟木從繩則正后從諫則聖后克聖臣不命其承疇敢不祇若王之休命

此一節書傳說因高宗望其進諫而即望高宗以納

諫也繩墨線彈以正木者疇誰也傳說復命于王曰
人臣進諫何難人君受諫乃為難耳譬之于木不是
生成便能端正必依從大匠繩墨用斧斤斲削之則
自歸于正而可以為器用矣人君亦豈能天生便是
聖人惟虛心克己聽從臣下之諫諍則自然動無過
舉日進無疆而優入聖域矣諫之當從也如此故君
不必求進言于臣惟當求受言于己君果能虛心從
諫而克聖則凡為臣者爭欲仰承德意進獻讜言雖

不命之言猶且先意承之沉重以王命諄切孰敢不竭盡忠悃抒納謨猷以敬順吾王休美之命乎臣亦願王以聖自期而勇于從諫可耳古人云泰山不擇土壤故能成其高滄海不擇細流故能成其大人主不遺葑菲芻蕘之言故能成其聖天下不患無敢言之臣而人主要當有受言之實廓度量以盡其才明勸賞以作其氣則聽納日廣資益弘多而作聖之基在是矣

說命中

此第二篇乃傳說受命作相之後與高宗推論治道之言

惟說命總百官乃進于王曰嗚呼明王奉若天道建邦設都樹后王君公承以大夫師長不惟逸豫惟以亂民此一節書史臣敘傳說承命而進誨于王也樹立也后王謂天子君公謂諸侯大夫師長皆官名也亂解作治傳說既受高宗之命位居冢宰總領百官則凡

匡主安民之責皆肩于其身矣于是承納誨之命進告于王先嘆息曰天地之位設而君臣之分定尊卑上下不容踰越是乃天秩有禮所謂天道也在古昔明王奉順天道創制立法乃先區畫天下之地建置邦國又于邦國之中分設都邑樹立天子為后王以統治天下諸侯為君公以分治一國且各承以大夫師長使居都邑以為之輔上下有制尊卑相維若是者豈欲以天下奉一人為安逸豫樂之計也哉良以

天心仁愛斯民不能自治故寄其責于君君亦不能
獨治故分其任于臣君主治于上臣輔治于下惟欲
使天下之民遂生復性共享樂利之休以無負上天
付託之意焉耳豈可自圖逸豫不各思其職各盡其
道以求合天心哉

惟天聰明惟聖時憲惟臣欽若惟民從乂

此一節書告高宗以法天治民之實也憲法也乂治
也傳說曰人君既奉天以治民即當法天以為治惟

天高高在上至虛至公至神至靈不庸聽而聰無不
聞不需視而明無不見不惟政令之得失民生之休
戚舉不能逃天之鑒即暗室屋漏之中不睹不聞之
地亦皆照察無遺焉天之聰明如此惟聖君以是為
法好惡不蔽于私賞罰皆當于理一如天之聰無不
聞明無不見也如此則可以表正萬邦而為臣民作
則矣夫臣民不同而此心之公無不同君誠至公則
臣之奉令守職而稟承于下者莫不敬順而亮天之

工民之心悅誠服而鼓舞于下者莫不從治而順天之則聖人一憲天而公道之感通不期然而然者有如此蓋好惡賞罰人主之大柄令出而臣共政行而民信非有他故也亦自盡其心于隱微之地而已心清明則事之叢而至者有以察其幾心精一則人之環而伺者無所投其隙以純王之心行純王之政何患不光四表而格上下哉

惟口起羞惟甲冑起戎惟衣裳在笥惟干戈省厥躬王

惟戒茲允茲克明乃罔不休

此一節書歷舉憲天之事以告高宗也戎兵也衣裳
命服也傳說曰天之聰明無所不照憲天聰明者亦
宜無事不然如口以出號令必斟酌當理而後臣民
凜然知所遵奉一時守為律令萬世奉為典謨若不
加檢點輕易出言則悖出必召悖入之羞矣甲冑本
以禦戎必兵戢而時動敵加而後應然後可以養威
弭患息寇安民若恃強凌弱無故興師則人心危懼

反以動天下之兵矣衣裳以命有德必謹之在笥待
有功而後予則賞不僭而人知勸干戈以討有罪必
省諸己身原無過而後加誅則罰不濫而人知懼此
四者皆出身加民國之大政一或不慎便喪聰失明
顛倒錯亂而違天道矣王惟戒謹乎此言勿輕出甲
冑勿輕動衣裳勿輕予干戈勿輕用真能信此四者
所關甚大所係匪輕而一一皆能洞其源燭其幾處
之無不各得其當焉由是言出為謨誥兵戢為神武

賞足以昭天命罰足以彰天討事事合天而無不休
美矣憲天之見于行政者如此夫所貴聰明者炳見
幾先而患必防諸未形洞曉原本而事必返諸在已振
紀綱慎賞罰急其先務持其大端而已聰明而善用
之庶可以憲天之聰明乎

惟治亂在庶官官不及私昵惟其能爵罔及惡德惟其
賢

此一節書乃憲天聰明之見于用人者也昵狎也惡

德包藏凶惡之人傳說曰天子奉天道建庶官以分

理天下官得其人則紀綱法度事事修舉小民皆得
安居樂業而治官非其人則紀綱法度事事廢弛小
民必至叛散流離而亂治亂之係于庶官如此故人
君用人不可不謹凡六卿百職皆共熙庶績之人不可
任及私昵蓋以私昵之人未必才能辦事縱或有才
亦必狎恩恃寵竊弄威權而天工隳矣惟當特選才
能之人而用之果其能與職稱即疏遠讎怨亦任之

不疑如是則官無曠職而庶績咸熙矣至于五等之爵尊卑雖有不同皆所以命德而勸賢者不可濫及惡德蓋以惡德之人大奸似忠大詐似信苟不辨而加之以爵勢必傾陷正人流毒天下惟當精選賢德之人而爵之果其德能稱爵即卑賤寒微亦寵之不棄如是則爵不濫予而賢皆知勸矣憲天聰明之見于用人者又如此自古天下治亂在人才盛衰而人才所以盛惟是謹好惡明取舍廣樹賢良矜惜名器

其原亦在君身而已中庸云取人以身仲虺之誥曰用人惟已誠不易之論也

慮善以動動惟厥時

此一節書乃憲天聰明之見于處事者也慮思慮也善當理也時時宜也傳說曰人君日有萬幾一不審慎便有過差而遺無窮之害故凡有舉動不可率意直行必熟思審處當于理而後動庶下可為臣民之法守後可為子孫之章程而無輕率躁妄之失矣然

善無定體隨時而在又必虛心裁度務適乎事機之會而不乖乎時措之宜應乎天而時行焉將見事無不善動與天合矣蓋君心者禮樂刑政之所從出也能揆度至理以為禮樂刑政之原而又因時變通如雨暘寒燠之各以時至而類應則君心之化裁如四序之不爽已憲天之要孰有踰于一心者哉

有其善喪厥善矜其能喪厥功

此一節書乃憲天聰明之見于處已者也有者自足

之意事有成績謂之功肆然矜誇謂之矜傳說曰德
莫貴于自新學莫患于自足如德有諸己謂之善苟
或自以其善為有餘則驕心一起怠心必生德不復
加進行不復加脩而並喪其所有之善矣如功措諸
外謂之能苟或自以其能為過人則自用之意既多
用人之量必隘智者不為之効謀勇者不為之効力
而並喪其已成之功矣是以自古聖帝明王善蓋天
下而守之以謙能高天下而守之以敬故功德莫與

京而比隆于天也

惟事事乃其有備有備無患

此一節書傳說欲高宗憲天聰明思患豫防也傳說曰禍患每伏于無形儆備當存于先事若待患至而後圖之則無及矣惟平居閒暇之時詳審于天理之公而酌行其人事之當然圖難于其易為大于其細而事其事焉乃其有備矣有備則素定之謀足以應變于不窮弭患于不作雖有意外非常之事而亦可

以無患矣然非法天以為聰明者不能先事而圖之
也可不勉哉蓋天下之患莫大乎苟且因循不為久
遠之計誠朝廷有警惕震厲之規則天下自無叢勝
廢弛之事益告舜曰儆戒無虞易之既濟曰思患豫
防古聖人之不忘警惕有如此

無啟寵納侮無恥過作非

此一節書傳說欲高宗憲天聰明戒溺愛徇己之私
也啟開也寵謂寵幸納受也侮謂侮慢無心失理謂

之過有心背理謂之非傳說曰左右近習之人朝夕

親近易以狎昵若寵幸太過則彼將恃恩無忌而生
侮慢之心是彼之侮乃我自取之也故當以此為戒
慎毋溺于所愛開寵幸之門以受人之侮也人孰無
過過而能改于已何損若自以有過為恥憚于更改
而強為遮飾則始出于無心之失終反遂成有心之
非矣故當以為戒慎毋恥于聞過為文飾之計以遂
已之非也夫不啟寵以納侮則佞日遠而聰明不為

所蔽不恥過以作非則過日寡而聰明不為所累此御下檢身之道也

惟厥攸居政事惟醇

此一節書傳說欲高宗憲天聰明歸本于宅心之學也居謂心安于所止醇不雜也傳說曰人君一心乃萬化之原欲法天以為治者當求天于吾心也惟能以義理涵養此心使方寸之中湛然虛靈寂然寧定義與心融理與心一而無一毫勉強之私則施之政

事莫非義理之流通大綱備舉而至純至粹萬目畢張而盡善盡美政事豈有不醇者乎夫有純王之心則所存者與天一矣有純王之政則所施者與天一矣此尤憲天聰明根本切要之工夫也

黷于祭祀時謂弗欽禮煩則亂事神則難

此一節書是論憲天聰明之見于事神者也黷褻瀆也時解作是煩繁多也傳說曰國家之祭祀如郊廟社稷山川百神祭有一定之時非其時則謂之黷本

以為敬而不知是謂之不敬也至于犧牲粢盛之數
升降周旋之節俱有一定之禮非其禮則謂之煩必
至擾亂而不可行以此事神不亦難乎知其難而戒
之則可以通于神明而憲天之道在其中矣夫事事
皆能憲天如此則臣豈有不欽若而民豈有不從又
者哉

王曰旨哉說乃言惟服乃不良于言予罔聞于行說拜
稽首曰非知之艱行之維艱王忱不艱允協于先王成

德惟說不言有厥咎

此二節書是高宗贊美傳說之言傳說勉高宗以躬行之實也旨美也服行也良善也忱者誠信之意先王指成湯高宗曰美哉汝說之言其論上天立君之意人君為治之方有關於治道有裨于君德我當服行汝之所言以為致治保邦之訓也夫以我之寡昧于為君之道有所未知若非汝以此善言開道則我將何所聞而措之于施行乎傳說拜而稽首言曰天

下道理但知之不足為難惟實見之施行乃為難事
王若不能體驗于身心發揮于政治雖知何益王若
于此深加誠信則有定志者必有定力行之自見其
不難而允協于我先王成湯之盛德美政是我之所
言者王不徒聽之而實能行之矣于斯時也說猶有
所隱匿而不言則是上負吾君下負所學其咎不在
于王而在于我矣夫高宗于傳說之言不惟即見採納
又且深加獎嘆傳說進言于高宗不惟期君之必行

而且責已之必言真可以為萬世君臣法也

說命下

此第三篇史臣記傳說與高宗論學之言

王曰來汝說台小子舊學于甘盤既乃遯于荒野入宅于河自河徂亳暨厥終罔顯

此一節書是高宗歷敘廢學之故而嘆其學之無成也甘盤高宗之師也遯解作隱宅居也河是河內之地徂往也亳是亳都顯明也高宗曰傳說汝來前予

小子舊日未即位時曾受學于賢臣甘盤講求脩身
治天下之道既而先王欲我習知民艱乃使隱居于
荒野之間後又入居于河內又自河內往至于亳居
無定所學無專功故其後遂荒廢舊業于天下之理
竟未能顯然明白于心我今將整理舊學以求終之
有成不能不賴汝之訓迪也

爾惟訓于朕志若作酒醴爾惟麴蘖若作和羹爾惟鹽
梅爾交修予罔予棄予惟克邁乃訓

此一節書是高宗望說傳以訓志之功也醴甘酒也麴

者造酒之麴蘖者造酒之米和羹者滋味調和之羹
湯梅所以調酸交修左右規正之意邁行也高宗曰
凡學之不明由于志之不正汝當獻納忠言開陳善
道以啟發我之心志譬如作酒醴者必資麴與蘖而
後成今我望汝涵養熏陶以成君德就如麴蘖一般
作和羹者必資鹽與梅而後和今我望汝調和變理
以贊化機就如鹽梅一般夫造酒者麴多則太苦蘖

多則太甘麴蘖得中乃能成酒作羹者鹽過則鹹梅
過則酸鹽梅得中乃能成羹汝欲成我之德亦必交
修于我多方以規正之委曲以維持之如我之氣質
或偏于剛汝則濟之以柔我之氣質或偏于柔汝則
濟之以剛汝切勿棄我以為不足與言也凡汝之言
我當篤信力行決不至于負汝之所訓也蓋高宗之
望傳說反覆懇至如此可見古之賢君必以下賢求
言為急務也

說曰王人求多聞時惟建事學于古訓乃有獲事不師古以克永世匪說攸聞

此一節書是傳說勉高宗以反己之學也建立也獲得也傳說因高宗孳孳訪問遂稱王而告之曰人君之于臣下廣詢博訪務求多聞者是其意惟欲建立修身治天下之事業耳然資之于人者尤貴反之于己故又必學于古先王之謨訓潛心勉力終始無間然後義理有得于心而可以為建功立事之本也若

不以古人為成法古訓為當遵則所行必不合于義
理而能久安長治者非說之所聞也然則王可不以
多聞學古為務哉蓋傳說所謂多聞學古者正欲講
求保邦致治用人行政之道實見諸施行耳非僅在
語言文字之間也

惟學遜志務時敏厥修乃來允懷于茲道積于厥躬
此一節書見為學貴有實功也遜謙遜也時敏謂無
時而不敏允信也懷念也傳說曰義理無窮工夫易

間必須卑遜其志不敢有一毫自足之心又必時時敏求不敢萌一毫自止之念夫虛以受人勤以勵己則其所修如泉水之來源源而不竭矣為學之方莫要于此若能篤信而深念之真知遜志之有益而驕心悉泯真知時敏之有成而怠心不生則充積日盛修身治天下之道皆統會于吾身矣王可不勉哉夫遜者入學之基敏者力學之事氣盛則理不聚虛其志所以觀理也力薄則業不大勇于任所以修業也

為學之事遜與敏焉盡之矣

惟數學半念終始典于學厥德修罔覺

此一節書言數之事亦學古有獲中事也數猶言教
典常也傳說又勉之曰王之為學固貴得之于已尤
貴公之于人蓋始而自學所以明德固學也終而教
人所以新民亦學也為學之道一半在實體諸心一
半在推廣諸世數學相須而後學可成也然勤學教
人矣而工夫或有間斷其學亦終于無成又必一念

惓惓終如其始而常在于學無少間斷則造詣純熟
所得益深而德之日修將有不知其然而然者矣大
抵身任君師之責則內外不可以不修道兼物我之
公則終始豈容以或間傳說可謂責難于君者矣
監于先王成憲其永無愆惟說式克欽承旁招俊乂列
于庶位

此二節書第一節是言為學之準的次節乃傳說以
薦賢自任而仍歸本于君德也監視也先王指成湯

憲法也愆過也傳說又勸高宗以法祖之道曰人君
為學不過取法乎善今之當法者孰有過于先王者
乎蓋我先王以天錫智勇之資又加以昧爽丕顯之
學其于修身治天下之理皆有典則法度以垂範後
世吾王不必遠有所慕但當率祖攸行修身則法其
制事制心之理為政則法其建中表正之規如此則
修身以至于治天下莫不盡善盡美而永無過差矣
蓋德雖造于罔覺而法必監于先王吾王其勉之哉

然修德者固人君之事而進賢者又大臣之職吾王
誠能典學法祖增修其德而至于無愆則說必能敬
承美意廣詢博訪凡大而千人之俊小而百人之人
皆為汲引分列于朝寧之間使之同心以匡乃辟吾
王但垂拱以責成之可耳何患不治哉蓋君德無愆
所以端出治之本俊傑在位所以廣佐治之功而要
之必君德修而後賢才爭樂為之用大臣之欲以人
事君者其亦必先引君當道乎

王曰嗚呼說四海之內咸仰朕德時乃風股肱惟人良臣惟聖

此二節書是高宗言人心仰德之切而深望傳說之輔已也風風聲也高宗歎息而歸美于說曰天下之所仰以為則者在于人君而人君之所賴以輔治者在于宰相今四海之內莫不引首舉踵喁喁焉仰望我之德化者良由汝說感于夢寐之際起于版築之間故其風聲足以聳動乎天下也高宗之意蓋言台

德弗類若不足以正四方而民皆望我以憲天法祖之治者非朕之德可以當此實惟汝有以風之也于是又責望之曰人之一身必手足俱備然後可以為人人君若欲作聖必是良臣輔導然後可以為聖此我之所以深有望于汝也夫高宗之于傳說始望之為霖雨舟楫繼喻之為麴蘖鹽梅至是又倚之為股肱蓋引喻愈切而屬望愈至矣故說終能納誨輔德答天下之望而為股肱良臣也

昔先正保衡作我先王乃曰予弗克俾厥后惟堯舜其
心愧恥若撻于市一夫不獲則曰時予之辜佑我烈祖
格于皇天爾尚明保予罔俾阿衡專美有商

此一節書是舉輔君作聖之人而欲傳說媲美于阿
衡也正解作長先正先世長官之稱保衡商時官名
先王指成湯作起也辜罪也佑輔佐也烈祖亦指成
湯格至也阿衡即保衡指伊尹高宗又勉傳說曰昔
我商開國之時有先正保衡伊尹所謂良臣也輔佐

我先王振興大業嘗曰我昔居猷畝之中以樂堯舜之道惟願上輔吾君為堯舜之君下治吾民為堯舜之民而已若不能使君為堯舜之君則心中愧恥即如撻之于市不但欲致君為堯舜已也若不能使民為堯舜之民四海之廣兆民之衆有一人不得其所或啼饑號寒或梗化不服皆謂為己之罪過伊尹之志如此故其佐佑烈祖成湯內則輔德使大德極其懋昭外則輔治使百姓歸于允殖以致烈祖德業之

成直與天地同流而無間焉此伊尹之所以輔君作
聖而稱美于有商也今爾既負伊尹之德又居伊尹
之任庶幾保佑乎我俾格天之烈再見于今豈可使
伊尹之相業專美于前耶夫為臣者不志伊尹之志
不足以盡臣道為君者不以伊尹之志責之臣不足
以成君德高宗傳說能交相勉如此所以能交相成
而立千古君臣之極與

惟后非賢不久惟賢非后不食其爾克紹乃辟于先王

永綏民說拜稽首曰敢對揚天子之休命

此一節書是高宗與傳說以聖主賢臣交相期勉也
又治也食食其祿也紹繼也乃辟猶言汝君高宗自
稱之辭綏安也對承受也揚播告也高宗命傳說曰
君臣相遇自古為難聖主必待賢臣以弘功業使非
輔君作聖之賢則寧虛其位豈肯與之共治是君遇
臣之難也賢臣亦俟聖主以顯其德使非從諫克聖
之君則寧終于隱豈肯苟食其祿是臣遇君之難也

今我夢賚旁求君臣相遇千載一時汝必感此非常
之會期立百世之功輔我繼先王之德以永安天下
之民則堯舜其君民者真不愧阿衡之美矣傳說聞
高宗之言遂拜手稽首曰輔君法祖以安民美哉天
子之命乎敢以此美命承之于已自信吾力之能為又
以此美命揚之于人自諒吾言之能踐傳說之復高
宗者如此夫天生蒸民而立之君佐君理物而任之
相舉其君于堯舜之隆而無一夫之不得其所此相

臣之職也傳說之期其君者曰學古訓曰監成憲君
不至于先王而其心不可以已也傳說之自期者曰
欽承曰對揚不輔君以至于先王而其心不可以已
也君臣之交相勸勉者如此洵千古泰交之盛哉

高宗彤日

祭之次日又祭謂之彤商高宗常行彤祭于禰廟其
日有雉雉之異賢臣祖己因進戒高宗欲其修德弭
災史臣錄其語而以高宗彤日名篇

高宗彤日越有雉雉祖已曰惟先格王正厥事

此二節書首一節是史臣記事之詞次節乃祖已將欲訓王而私論之也越發語辭雉雉鳴雉也格正也史臣記高宗彤祭禰廟之日忽有雉飛來鳴于鼎耳之上夫祭有常期而高宗數祭禰廟是黷于祭祀之失也雉雉之異以譴告之可見天心之仁愛矣祖已感雉雉之異將進戒于高宗先自商曰凡天降災祥必應于事而人事得失皆本于心今王黷祭禰廟其

事固為失矣而推原其故實自媚神求福之念啟之
我今進戒必先格王之非心而後正其所失之事庶
幾王心易悟而吾言易入也夫高宗不務民義而徼
福祈命此非心也不知敬民而祀豐于昵此失事也
祖己之言可謂得進諫之道矣

乃訓于王曰惟天監下民典厥義降年有永有不永非
天天民民中絕命民有不若德不聽罪天既孚命正厥
德乃曰其如台

此二節書言天命之不可求天戒之不可忽也典猶言主義行事合宜也若德順理也聽罪服罪也享命是以妖孽為信驗而告戒之台我也祖己欲先格王心乃勸戒于高宗曰天之監視下民其禍福予奪惟主于所行之義與不義耳如其義則天降之年必然長永如其不義則天降之年必然不永故人之不獲永年者非天無故夭折其民乃民之所行不義而中道自絕其命耳然天又未嘗遽絕之也斯民之中有

不順乎理而肆意妄為不服其罪而飾非拒諫者天未嘗不以妖孽為信驗以告戒之夫天既譴告欲其順德而聽罪耳乃謂妖孽持出偶然無如我何則重違上天仁愛之心矣天豈不誅絕之哉夫黷祀媚神安能獲福而天戒之臨必當有故非恐懼修省不足塞咎祖已之言惓惓若此此所謂能格心者也

嗚呼王司敬民罔非天庥典祀無豐于昵

此一節書所以正其事之失也司主也庥嗣也豐厚

也昵親近也祖已既格王之心乃直正其所失之事而歎息曰天以斯民而付之王是王之職主于敬民而已舍此而徼福于神豈王之所司乎況祖宗列聖雖有親疎遠近之不同然無非繼天之統為天之嗣吾王承其後而主其祭只當一體孝敬豈可專顧私恩而獨豐于親近之禰廟乎以人君之職而言則主于敬民而徼福事神非所當為以祭祀之禮而言則祖宗皆天之嗣而祀不可獨豐于昵夫不務敬民而

務黷神一失也不並隆于祖而獨豐于昵又一失也
高宗越禮用情故祖己因天變而戒之如此

西伯戡黎

文王舉兵勝黎祖伊見周之日盛痛殷之將亡遂進
諫于紂欲其懼而改省也史臣錄其言以西伯戡黎
名篇

西伯既戡黎祖伊恐奔告于王曰天子天既訖我殷命
格人元龜罔敢知吉非先王不相我後人惟王淫戲用

自絕

此二節書首節史臣記事之詞次節祖伊告王之詞也西伯周文王也受命為西方諸侯長故稱西伯黎國名戡勝也祖伊殷之賢臣王指紂言訖絕也格人有識之至人也相助也史臣曰西伯受命于殷得專征伐黎國無道舉兵伐之此時既勝黎國殷之賢臣有祖伊者見周德方隆勢日强大紂惡愈甚勢必危亡惟恐戡黎之後遂有伐殷之舉乃自私邑奔走來

告于王蓋忠君憂國之意欲王之改過以圖存也祖
伊進諫于王先呼天子以感動之曰國命修短皆係
于天由今日而觀上天既已斷絕我殷之命脉矣何
以知之蓋國家之興亡其幾先見惟至誠之人至靈
之龜乃能前知今有識之至人與占卜之元龜皆知
凶禍必至無敢有知其吉者則天之絕我殷命昭然
可見矣然殷家基業自祖宗列聖相傳到今豈不欲
保佑我後世子孫使之長守而不墜哉蓋由我王不

法祖宗不畏天命惟淫亂戲侮以自絕于天故雖先王在天之靈亦不得而庇佑之耳王可不亟思改過以回天意乎

故天棄我不有康食不虞天性不迪率典今我民罔弗欲喪曰天曷不降威大命不摯今王其如台王曰嗚呼我生不有命在天

此三節書首節是備述喪亡之形二節言民之棄殷三節見紂之怙惡也康安也虞忖度也典常法也大

命乃受非常之命者摯至也祖伊曰我王既自絕于天故天棄我殷種種皆是喪亡之象如民以食為天今則水旱饑荒小民無有安食而民不聊生矣民各有恒性今則悖禮傷道下民昧其本心而天理滅亡矣國家之常典所當世世守之者也今則綱紀廢弛法度變亂不復率由先王之舊章而國不可以為國矣不有康食天不欲遂其生也不虞天性天不欲復其性也不迪率典天不欲其治平也于此見天之棄殷而格

人元龜之罔敢知吉者在是矣且不但天心棄之也
今我殷邦之民苦于虐政亦無不欲殷之喪亡每私
相告語曰今我等困苦至此上天如何不降威于殷
而滅亡之乎其有道之君宜受非常之命者如何不
至而救我于水火之中乎今我王失為君之道斷難
久居民上將無奈我何矣民之棄殷如此夫人君立
天人之間而為上下所交棄其勢必至于危亡雖先
王其能相之乎祖伊之言痛切極矣紂乃不知悔過

而歎息曰爾雖云民心背畔將欲亡我然我尊為天子實天生我以主萬民獨不有命在天乎小民亦無如我何矣夫紂當天怒民怨之日而為飾非拒諫之言此所以終于滅亡而莫可救也

祖伊反曰嗚呼乃罪多參在上乃能責命于天殷之即喪指乃功不無戮于爾邦

此二節書祖伊退而私論之詞也反退也參參列也乃猶言汝指紂言功事也祖伊見紂不聽其言遂退

而歎息曰人君必須與天合德方可責望于天汝今之
所為罪惡昭著固已參列在上而不可掩矣又安能
責望于天而保其命耶我見殷之喪亡直在旦夕不
能久延矣所以然者為何蓋今日所為之事皆天怒
民怨之事事勢至此其能免戮于商邦乎蓋祖伊憂
國之深故其言痛切如此大抵亡國之君不畏天命
不恤人言人以為至危而彼以為至安如夏桀言我
有天下如天之有日紂亦言我生不有命在天及其

喪亡有如一轍所謂與亂同事罔不亡者此也萬世人主可不鑒哉

微子

紂失其政禍敗方興微子痛殷之將亡謀于箕子比干而思盡致身之道史臣錄其問答之詞以微子名篇

微子若曰父師少師殷其弗或亂正四方我祖底遂陳于上我用沈酗于酒用亂敗厥德于下

此一節書是言紂之失道也父師箕子也少師比干也亂正之亂解作治字底致也遂成功也陳列也恃酒行凶謂之酗微子見紂惡之日甚痛商祚之將亡乃呼箕子比干而告之曰父師少師我殷失道前此猶望其能改自今觀之無復望其或能治正四方矣夫人君所以表正四方者以其能修德也昔我祖成湯懋昭大德以致成功勲烈昭著于上乃今日我子孫不以修德法祖為務惟沈湎酗酒用亂敗其德于

下豈不有忝于烈祖乎夫我祖之昭列于上者如彼而子孫之亂敗于下者如此祖宗以艱難得之後世以逸欲亡之可痛甚矣

殷罔不小大好草竊姦宄卿士師師非度凡有辜罪乃罔恒獲小民方興相為敵讎今殷其淪喪若涉大水其無津涯殷遂喪越至于今

此一節書言紂喪亡之形也草竊草寇也師師互相倣倣也非度非法之事也獲得也津涯水邊隄岸也越

解作及微子又曰我殷既亂敗厥德不能治正四方
故今日四方人民無小無大皆不務生理不畏法度
只好草竊為姦宄之事無有安居樂業者矣不但小
民為然上而卿士亦皆彼此倣倣自恣于法度之外
互相容隱凡有姦宄犯罪之人亦不窮究無有得其
罪而治之者是以小民益無忌憚方且羣然而起相
敵相讎以強凌弱以衆暴寡國家法紀于是乎蕩然
矣事勢至此我殷家必淪于喪亡不可復救如徒涉

大水者茫茫無有涯岸亦終于沉溺而已豈意我殷之盛一旦喪亡相及至于如此之甚乎微子上陳烈祖之德下述喪亡之形言有盡而意無窮哀痛迫切之情至今猶令人感傷悲憤其憂國忠君可謂至矣曰父師少師我其發出狂吾家耄遜于荒今爾無指告予顛隳若之何其

此一節書微子更端以問救亂之策也我指紂言耄老成之人也遜于荒是遜于荒野顛隳覆墜也其語

辭微子復呼箕子比干問救亂之策曰大凡朝廷清明則老成之人得安其位今我王發出顛狂用舍倒置以致吾家老成之人皆遯避于荒野國家若有緩急將誰倚賴乎今所與共圖國事者惟父師少師而已爾若不明示意指告我于顛隳覆亡之時而圖所以維持拯救之策其將奈之何哉微子欲挽宗社于淪喪之時延祖業于敗亂之日憂危之甚特為更端問難之策其情迫其詞哀已

父師若曰王子天毒降災荒殷邦方興沈酗于酒乃罔
畏畏咈其耆長舊有位人

此下皆箕子答微子之詞首節答沈酗于酒之語次
節答發狂耄遜之語也微子帝乙之長子而紂之庶
兄故稱為王子方興言將來未艾也罔畏畏乃不畏
其所當畏也咈逆也耆長老成之人也箕子呼微子
而答之曰我國家昏亂自絕于天天毒降災害以荒
廢我殷邦故使王不知悔禍而益沈酗于酒其勢方

興未艾不至于喪亡不已矣彼夫老成者舊乃朝廷
之典型所當敬而畏焉者今既沈酗于酒心志昏迷
乃不畏其所當畏雖老成耆舊有位之人皆拂逆而
棄逐之使不得安其位而行其志故耄遜于荒非見
幾而自去由斥之而然耳雖欲不亡其可得乎

今殷民乃攘竊神祇之犧牷牲用以容將食無災降監
殷民用乂讎斂召敵讎不怠罪合于一多瘠罔詔

此二節書首節答草竊姦宄之語次節答小民相為

敵讎之語也攘取也犧牲祭神之物也純色謂之犧全體謂之牷牛羊豕總謂之牲監視也又治也讎斂言科斂民財如讎敵也瘠餓殍也詔告訴也箕子又答微子曰國家為治須是有司奉法乃能使民不犯今我殷民乃有攘竊神祇之犧牲者夫禮莫重于祭祀祭祀之犧牲輒敢攘竊之其罪大矣為有司者乃相為容隱將而食之且無災禍蔑法廢禮至此已極非但草竊姦宄之不治已也夫人君之失民心

常自聚斂始我今下視殷民凡上所用以治之者無復他事惟是嚴刑峻罰讎視其民而科斂之耳夫上以讎斂下下即以讎視上下方敵讎其上而上之所以召其敵讎者乃竟肆然為之無有厭怠其撻尅之臣阿意順旨同惡相濟合而為一故民不聊生多饑餓疲困而無所告訴此天下之所以困窮而人心之所以怨畔也蓋直君民相為敵讎而不獨小民互相敵讎矣

商今其有災我興受其敗商其淪喪我罔為臣僕詔王子出迪我舊云刻子王子弗出我乃顛隳

此一節書答淪喪顛隳之語也興出也迪道也刻害也箕子又答微子曰我商家敗德荒政國亂民窮今日具有災禍矣我為宗室大臣出而當此禍敗則廢興存亡與國共之若商祚至于淪喪我亦終守臣節斷不為他人之臣僕也是我之自處固宜如此若王子一身之去就則宗祀存亡之所關故我告王子惟

出而遠去乃合于道蓋我舊日以王子既長且賢曾
勸先王立以為嗣而先王不從今王必有疑忌之心
是我舊日所言無益于子而反有害于子王子不去
則必同受其禍我商宗祀將隕墜而無所託矣是王
子之自處又宜如此我之與王子其行不同固不可
同日而語也箕子自言其義決不可去而微子之義
決不可不去也微子問救亂之策而箕子答之如此
蓋以商之喪亡其勢不可復救惟求存商祀于不墜

為救亂之策耳紂惡貫盈天人交棄至于淪喪顛隳
若此洵為萬世之明戒哉

自靖人自獻于先王我不顧行遯

此一節書告微子以彼此去就之義各安其分之所
當盡也靖安也自獻自達其志也行遯避去也箕子
答微子將終又告以去就之義曰人臣去就自有至
當不易之理必合于義而其心始安當就者安于就
之義為商家守節之忠臣當去者安于去之義為商

家存祀之孝子為今之計各安于義之所當盡以自達其志于先王而已汝今固宜遠去若我所處與汝不同則有死無二而不復有避去之意矣是或去或不去皆揆諸義理而當反諸吾心而安質諸先王而無愧者也子何疑哉夫箕子答微子之問而比干獨無所言者比干自安于死諫之義所以自靖自獻一而已矣孔子曰殷有三仁焉蓋三人之行不同而皆由于義之至正各得其心之所安故孔子皆許之以


仁也

日講書經解義卷五

謹案第三十一頁前四行叙用也刊本用訛川據

蔡傳改

欽定四庫全書



總校官庶吉士臣侍朝

校對官庶吉士臣陳墉

膳錄監生臣章浴曾